



Resultate persverklaring vir die jaar geëindig 30 Junie 2021

BEMOEDIGENDE TEKENS VAN HERSTEL VIR REMGRO PORTEFEULJE

- Wesensverdienste per aandeel van voortgesette bedrywighede: op met 66.0% tot 510.6 sent
- Totale wesensverdienste per aandeel: af met 8.9% tot 510.6 sent
- Verdienste per aandeel: af met 46.6% tot 628.3 sent
- Totale gewone dividend per aandeel: 90 sent
- Intrinsieke netto batewaarde per aandeel soos op 30 Junie 2021: R177.33

Inleiding

Aan die begin van die Covid-19-pandemie het Remgro se voorsitter, mnr Johann Rupert, opgemerk dat die impak daarvan nie 'n verposing ("pause") is nie, maar eerder 'n herstelling ("reset") behels. Hoewel mnr Rupert die stelling meer as 'n jaar gelede gemaak het, glo ons dat dit steeds waar is. Die pandemie, en gevolglike bekampingsmaatreëls, het onmeetlike skade wêreldwyd veroorsaak, maar hierdie ontberinge het ook aan individue, maatskappye en organisasies die geleentheid gegee om te besin en, waar toepaslik, aanpassings te maak.

Remgro gaan voort om by veranderende markte aan te pas, soos wat dit die afgelope 73 jaar van sy ryke geskiedenis suksesvol gedoen het. As deel van hierdie verandering plaas Remgro toenemend klem op sy omgewings-, maatskaplike en bestuurspraktyke (ESG) regdeur die groep. Hoewel werkplek-, ekonomiese, maatskaplike en omgewingsvolhoubaarheidspraktyke nog altyd deel van Remgro se kernwaardes was, streef die maatskappy daarna om 'n ESG-leier te wees en is besig om maatreëls te implementeer wat sal verseker dat Remgro tot sy korporatiewe burgerskapsmandaat en waardegedrewe etos verbind bly.

Terwyl die nagevolge van die pandemie nog lank gevoel sal word, en waar nog ver van die pre-Covid vertoning, is Remgro bemoedig deur sy verbeterde vertoning vergeleke met die vorige finansiële jaar. Dit bevestig weereens die verdedigende aard en veerkragtigheid van Remgro se portefeulje.

Resultate

Vir die jaar tot 30 Junie 2021 het wesensverdienste van voortgesette bedrywighede met 66.1%, vanaf R1 737 miljoen tot R2 885 miljoen toegeneem, terwyl wesensverdienste per aandeel (WVPA) van voortgesette bedrywighede met 66.0%, vanaf 307.5 sent tot 510.6 sent toegeneem het. Totale wesensverdienste en totale WVPA het met 8.9%, vanaf R3 167 miljoen tot R2 885 miljoen, en vanaf 560.6 sent tot 510.6 sent onderskeidelik, afgeneem.

Die wesensverdienste van voortgesette bedrywighede vir die vergelykende jaar is, gedurende die tweede ses maande tot 30 Junie 2020, wesentlik beïnvloed deur die Covid-19-pandemie en die gevolglike

inperkingsmaatreëls, sowel as 'n eenmalige donasie van R500 miljoen aan The South African SME Relief Trust. Die toename, vanaf hierdie lae basis, in wesensverdienste van voortgesette bedrywighede vir die jaar onder oorsig is hoofsaaklik meegebring deur die herstel van die verdienste van meeste van Remgro se onderliggende beleggings (veral RCL Foods Beperk (RCL Foods), Distell Group Holdings Beperk (Distell), TotalEnergies Marketing South Africa Eiendoms Beperk (TotalEnergies) en Rand Merchant Investment Holdings Beperk (RMI)). Hierdie toename is gedeeltelik teengewerk deur 'n verminderde bydrae van Mediclinic International plc (Mediclinic) (Mediclinic se bydrae sluit die volle impak van die Covid-19-verwante inperkingsmaatreëls op sy resultate vir die jaar geëindig 31 Maart 2021 in), sowel as laer rente-inkomste as gevolg van die verlaging van die 300 basispunte in rentekoerse sedert Januarie 2020. Daarby het die rekeningkundige herklassifikasie van FirstRand Beperk (FirstRand), van 'n geëkwiteerde belegging na 'n belegging teen billike waarde deur ander omvattende inkomste, beteken dat slegs dividendinkomste van R191 miljoen van FirstRand verantwoord is vir die jaar onder oorsig, terwyl verdienste van R657 miljoen in die vergelykende jaar geëkwiteer is.

Kommentaar op die bydrae van elk van die onderliggende rapporteringskategorieë word in die geouditeerde verkorte gekonsolideerde resultate vir die jaar geëindig 30 Junie 2021 hiermee saam vrygestel.

Intrinsieke netto batewaarde

Remgro se intrinsieke netto batewaarde per aandeel het met 14.8%, vanaf R154.47 op 30 Junie 2020 tot R177.33 op 30 Junie 2021, toegeneem. Die sluitingsaandeelprys op 30 Junie 2021 was R114.60 (2020: R99.90), wat 'n diskonto van 35.4% (2020: 35.3%) tot die intrinsieke netto batewaarde verteenwoordig.

Kontant by die kern en verklaring van kontantdividend

Remgro se kontant by die kern op 30 Junie 2021 was R9 706 miljoen (2020: R17 073 miljoen).

Vir die jaar geëindig 30 Junie 2021, is 'n finale bruto dividend van 60 sent (2020: 50 sent) per aandeel verklaar uit inkomstereserwes ten opsigte van beide die gewone aandele sonder pariwaarde en die ongenoteerde B-gewone aandele sonder pariwaarde.

Jannie Durand, hoofuitvoerende beampste van Remgro, sluit af:

“Ons verstaan die belangrikheid van relevansie en die noodsaak om aanpasbaar te wees en, in hierdie verband beskou ons 2020, die jaar van die pandemie, as 'n ideale en geleë tyd om na binne te kyk, te besin en te herkalibreer. Komende uit daardie proses, wat voort duur, glo ons dat dit nou die tyd is om te herstel – om meer te doen as om te verpoos en aan te pas, maar om die aanduidings van verandering te herken.

Hoewel heelwat onsekerheid steeds bestaan midde-in die voortdurende Covid-19-pandemie, stadige inentingsvordering en die gevolge van die onlangse onrus in Suid-Afrika, is ek bemoedig deur die aantal mense uit alle hoeke van ons samelewing wat na vore kom en bereid is om te help bou aan 'n beter toekoms vir Suid-Afrika ondanks al die uitdagings wat ons in die gesig staar. Ons gesondheidswerkers, besighede, regering en godsdiensleiers, die mense wat beskadigde buurte opgeruim en herstel het na afloop van die maatskaplike onrus, ons sportspanne en atlete en elke organisasie en betrokke landsburger wat hul onwrikbaar daartoe verbind om 'n sukses van die land te maak, vul my met hoop vir die toekoms.

Remgro bly verbind tot hierdie land en ons sal voortgaan om ons rol te vervul en te help verseker dat Suid-Afrika sterker uit hierdie uitdagende tye as 'n nasie kom. Dis nou belangriker as ooit dat ons saamstaan as 'n land en vorentoe beweeg tot voordeel van al ons mense.”

Kontak: Remgro Beperk
Lwanda Zingitwa (Beleggerverhoudings): investor.relations@remgro.com

Uitgereik en versprei deur: Remgro Beleggerverhoudings

Uitreikingsdatum: 22 September 2021

JSE kode: REM

Webwerf: www.remgro.com

REDAKTEUR SE AANTEKENINGE

Groepprofiel

Remgro, wat oorspronklik in die 1940's deur wyle dr Anton Rupert tot stand gebring is, se beleggingsportefeulje het aansienlik uitgebrei en bestaan tans uit onderliggende beleggings, versprei oor nege kategorieë. Die maatskappy is op die Johannesburgse Aandelebeurs (JSE), wat in Suid-Afrika deur die JSE Beperk bedryf word, onder die "Finansiële – Finansiële Dienste – Beleggingsbank en Makelaarsdienste – Gediversifiseerde Finansiële Dienste"-sektor genoteer, met die aandelekode "REM". Remgro se belange bestaan hoofsaaklik uit beleggings in die gesondheidsorg, verbruikersprodukte, finansiële dienste, infrastruktuur, nywerheid en media industrieë. Remgro se mees wesentlike beleggings is Mediclinic (44.6%-belang), RMI (30.6%-belang), Community Investment Ventures Holdings Eiendoms Beperk (55.2%-belang), Distell (31.7%-belang), FirstRand (3.3%-belang), Siqalo Foods Eiendoms Beperk (100.0%-belang), RCL Foods (80.4%-belang), Air Products South Africa Eiendoms Beperk (50.0%-belang), TotalEnergies (24.9%-belang) en Kagiso Tiso Holdings Eiendoms Beperk (KTH) (43.5%-belang). Hierdie beleggings dra ongeveer 89% tot Remgro se intrinsieke netto batewaarde (INBW na belasting) by.

Vergelyking met vorige tydperk

RMB Holdings Beperk (RMH) en FirstRand

Gedurende Junie 2020 het Remgro sy 28.2%-belang in RMH ontbondel (RMH-ontbondeling) en gevolglik is die belegging in RMH as 'n beëindigde bedrywigheid hanteer vir die jaar geëindig 30 Junie 2020. Vir die jaar onder oorsig word verdienste en wesensverdiensmate maatstawwe vir voortgesette en beëindigde bedrywigheede weer aangebied en gevolglik sluit beëindigde bedrywigheede vir die vergelykende jaar die geëkwiteerde inkomste van RMH in.

Daar moet ook op gelet word dat met ingang van 8 Junie 2020, Remgro se beduidende invloed oor FirstRand beëindig is vanweë, onder andere, die RMH-ontbondeling en gevolglik is die belegging herklassifiseer van 'n geëkwiteerde belegging na 'n belegging teen billike waarde deur ander omvattende inkomste (FirstRand-herklassifikasie). Vir die vergelykende jaar is die belegging in FirstRand geëkwiteer, terwyl, vanaf die datum van die FirstRand-herklassifikasie, net dividendinkomste van FirstRand in die inkomstestaat verantwoord word. Dividende van R191 miljoen is vanaf FirstRand gedurende die jaar onder oorsig ontvang (2020: kontantdividende van R655 miljoen). As gevolg van die Covid-19-pandemie, het FirstRand slegs 'n tussendividend gedurende die jaar onder oorsig betaal.

Rapporteringskategorieë

Elke wesentlike belegging word as 'n bedryfssegment geklassifiseer. Bedryfssegmente word in kategorieë aangebied. Kategorieë bestaan uit beleggings met soortgelyke ekonomiese eienskappe. Soos voorheen gerapporteer, is die kategorieë waarin daar oor die resultate van onderliggende beleggings aan die hoof bedryfsbesluitnemer gerapporteer word, gewysig en sommige beleggings hertoegedeel in lyn met interne rapportering ten einde kommunikasie met belangegroep te verbeter. Die *media en sport* en *ander beleggings* kategorieë, waaronder gerapporteer is tot aan die einde van die 2020-finansiële jaar, is met die volgende nuwe kategorieë vervang:

- *Media* (bestaande hoofsaaklik uit eMedia Investments Eiendoms Beperk);
- *Portefeuljebeleggings* (nie-strategiese beleggings bestaande hoofsaaklik uit FirstRand en British American Tobacco plc);
- *Gediversifiseerde beleggingsvoertuie* (entiteite wat as hoofbesigheid self beleggings maak, bestaande hoofsaaklik uit KTH, die Asiese fondse, Invenfin Eiendoms Beperk en Pembani Remgro Infrastruktuurfonds); en
- *Maatskaplike impakbeleggings* (bestaande hoofsaaklik uit die Blue Bulls-rugbyfranchise en Stellenbosch Academy of Sport Eiendoms Beperk).

Vergelykende syfers is dienooreenkomstig aangebied.